

24 AUG 2000

BNM-PERSIDANGAN/I

BNM ATUR PERSIDANGAN MENGENAI CABARAN BANK-BANK PUSAT PADA 28 OGOS

KUALA LUMPUR, 24 Ogos (Bernama) -- Bank Negara Malaysia (BNM) akan menganjurkan persidangan peringkat tertinggi selama tiga hari bermula 28 Ogos ini di mana isu dan cabaran yang dihadapi bank-bank pusat dan pembuat dasar pada Abad ke-21 akan dibincangkan.

Matlamat persidangan itu adalah untuk menyediakan forum bagi berbincang mengenai isu-isu semasa yang berkaitan dengan bank pusat dan pembangunan ekonomi mapan, demikian menurut satu kenyataan di sini hari ini.

Perdana Menteri Datuk Seri Dr Mahathir Mohamad akan membentangkan ucap terna di 29 Ogos sementara Menteri Kewangan Tun Daim Zainuddin akan membentangkan ucapan di majlis makan malam mengenai pembiayaan pertumbuhan ekonomi pada 28 Ogos.

Persidangan itu dianjurkan bersama dengan Persatuan Ekonomi Malaysia sempena penubuhan Kerusi Tun Ismail Ali dalam bidang Ekonomi Monetari dan Kewangan di Universiti Malaya, kata BNM.

The Chair ditubuhkan oleh BNM sebagai penghormatan kepada Allahyarham Tun Ismail Mohamed Ali, rakyat Malaysia yang pertama menyandang jawatan sebagai gabenor BNM.

Tun Ismail menjadi gabenor BNM dari 1962 hingga 1980. Beliau meninggal dunia pada 6 Julai 1998.

BNM berkata semasa bertugas di bank pusat, Tun Ismail telah memainkan peranan yang besar dalam pembentukan asas yang kukuh dalam sektor kewangan negara ini.

Beliau dihormati dan dikagumi di peringkat antarabangsa, khususnya di kalangan masyarakat bank pusat, tambahnya.

Di persidangan yang akan diadakan, antara topik yang akan dibincangkan adalah aliran modal dan rejim tukaran asing, prospek matawang tunggal bagi rantau ini dan peranan sektor perbankan yang berubah.

Yang lain adalah cabaran yang dihadapi oleh pasaran modal, pembangunan ekonomi mapan, proses liberalisasi perdagangan dan cabaran-cabaran lain dasar bank pusat dalam ekonomi baru Abad ke-21.

Antara penceramah terkemuka di persidangan itu adalah Timbalan Perdana Menteri dan Menteri Perdagangan Thailand yang juga dilantik sebagai Ketua Pengarah Pertubuhan Perdagangan Dunia Dr Supachai Panitchpakdi; penerima anugerah Nobel pada 1999 Professor Robert Mundell; Naib Pengerusi AIG International Limited Sir Alan Walters; dan bekas ketua ekonomi Bank Dunia Profesor Joseph Stiglitz.

-- BERNAMA

MSL FR JR MA